

LUNA DI CONSCIENTISACION DI
CANCER NA PECHO

OCTOBER
2023



ISLA ONLINE

Noticia Transparente di Gobierno

Dialuna 16 October 2023

Email: IslaOnline@gobierno.aw Tel: 528-4952



NOS MISION PA CONSCIENTISA

October ta luna di
conscientisacion di
cancer na pecho.
Laga nos uni pa
comparti
conocemento,
sosten y speransa.

#closethecaregap



OCTOBER
LUNA DI CONSCIENTISACION DI
CANCER NA PECHO

LUNA DI CONSCIENTISACION DI
CANCER NA PECHO

OCTOBER
2023



Evelyn Wever-Croes
PROME MINISTER



Danki na vision
y determinacion
Minister di Deporte
Endy Croes

STADION GUILLERMO PROSPERO TRINIDAD

TA DUNA BON BINI
NA E PROME WEGA
DI SELECCION
Pabien Aruba cu
victoria riba Virgin
Island

Den e curason di e bario di Dakota,
un stadion cu pa hopi tempo no
a haya atencion di mantencion
debido, un biaha mas ta yama bon
bini na e prome wega di seleccion
di Aruba despues di e bunita fase
di renobacion y un animo renoba
tambe pa sigui uza e facilidad aki
pa diferente deporte y pa tur edad
di nos deportistanan.

E stadion ainda no ta
completamente cla pero
pronto lo para den tur su
splendor atrobe pa brinda
miho oportunidadnan pa nos
deportistanan y nos pueblo.



Continuacion Danki na vision y determinacion di Minister di Deporte....



Diasabra 14 di October, despues di 7 aña, e seleccion di Aruba por a hunga na Aruba atrobe den e Stadion Guillermo Prospero Trinidad. Desde 2016, seleccionnan di futbol di Aruba no por a hunga weganan di cas oficial di FIFA na Aruba, pa motibo cu e condicionnan di Stadion Guillermo Prospero Trinidad no tabata cumpli cu e standardnan necesario.

Gabinete Wever-Croes II, apesar di temponan dificil, a logra e fondo necesario pa haci inversion den Stadion Guillermo Prospero Trinidad y e prome wega di Concacaf Nations League Selecion Masculino di Aruba vs Virgin Island por a tuma luga apesar cu e stadion ainda no a keda cla.

Durante e inauguracion di e prome wega aki cu a tuma luga den Stadion Guillermo Prospero Trinidad, un publico presente

hopi anima a laga nan aplausonan resona, recordando nos cu amor pa deporte por transforma no solamente un luga, sino e animo di henter un comunidad.

Cu cada wega hunga den e stadion aki, nos ta cultiva e soñonan di nos muchanan, criando un futuro unda forsa, trabou di ekipo, y determinacion ta guia nos pa un miho nacion. Den e arena di deporte, nos ta haya unidad, inspiracion, y e promesa di un futuro mas briyante.

Prome Minister Evelyn Wever-Croes ta felicita Aruba cu Stadion Guillermo Prospero Trinidad cu pronto lo wordo completamente renoba y ta gradici Minister di Deporte Endy Croes pa su vision y determinacion pa brinda nos deporte e oportunidad aki. Papien Aruba cu victoria cu un score 3-1 riba Virgin Island poniendo Aruba na cabes di e grupo. ■■■

LUNA DI CONSCIENTISACION DI
CANCER NA PECHO

OCTOBER
2023

Ursell Arends

MINISTER



RIBA 135
STAKEHOLDERS
INVITA PA PROME

FORO NACIONAL PA ADULTO MAYOR

Proximo siman lo tuma luga, pa prome biaha, un foro caminda varios entidad publico, semi publico y priva lo bini hunto pa contribui na defini loke ta bay ta e plan di maneho di Aruba pa cu adulto mayor.

E encuentro ta un iniciativa di Ministerio di Asuntonan di Adulto Mayor hunto cu Banco di Seguro Social (SVB), Seguro Medico General (AZV), Fondo di Pension di Sector Turistico Aruba (PFTSA), Fondo di Pension General Aruba (APFA) y Organizacion di Penshonado Publico Arubano (OPPA).





Durante dos dia, casi 135 stakeholders invita, lo sinta pa haya presentacion, pero tambe dialoga pa fiha un maneho cu tur esunnan involvi den e bida y bienestar di adulto mayor.

Di e manera aki kier pone un topico cu a negligencia pa demasiado tempo, sac'e for di contexto politico y dun'e su importancia mereci pa produci un vision pa e proximo 10 aña cu tur hende ta di acuerdo cu ne.

“Mi ta kere cu como comunidad y gobierno di Aruba, nos debe esaki na nos adultonan mayor pa e Aruba cu nos a hereda awe y ta nos deber pa garantiza nan un bon calidad di bida awor cu nan a yega nan edad di pension,” asina Minister di Asuntonan di Adultonan Mayor, Ursell Arends a duna di conoce. Hunto cu su ekipo a scoge seis tema pa traha riba dje, esta movilidad, demografico, vivienda, cuidado, bienestar y representacion.

E mandatario a splica cu e ultimo ta uno importante ya cu fuera di e 3 mil pensionado for di sector publico cu ta representa pa OPPA, tin casi 18 mil pensionado di sector priva cu no tin ningun instancia pa defende nan interes.

Esaki ta un tema cu sigur lo discuti durante e foro, segun Minister Arends. E conclusion y proyectonan cu sali for di e foro lo ta reparti riba corto y mediano plaso, caminda ta premira algun inicio tumando luga, ya caba, prome cu fin di 2023 y otro durante proximo aña.

Un ehempel di esaki ta e lista cu 600 adulto mayor wardando riba un vivienda. Durante e foro lo discuti e situacion, lo tende di e stakeholders correspondiente y hunto lo yega na posibel solucion. Fuera di esey, Gabinete Wever-Croes II ta promove

un proyecto pa produci mas trahado pa e sector di cuidado; un asina yama leerwerktraject caminda sector publico y priva lo uni forsa pa bin cu e sede, recurso y acreditacion pa estudiante core stage den area di cuidado, administracion y alimentacion geriatrico y asina eleva e calidad di casnan priva di cuidado.

E foro ta dianan diamars 17 y diaranson 18 di october proximo y ta exclusivamente pa stakeholders, sinembargo, Minister di Asuntonan di Adulto Mayor lo informa riba e manera con lo por sigui e desaroyonan di esaki a traves di diferente plataforma.

Posteriormente, tambe ta organisa un Golden Age Expo den luna di november caminda lo brinda oportunidad na diferente stakeholder pa comparti informacion valioso cu e comunidad di adulto mayor riba e isla cu e meta di brinda servicio, pero tambe recluta miembro y boluntario pa servicionan cu ta na nan propio beneficio.



LUNA DI CONSCIENTISACION DI
CANCER NA PECHO

OCTOBER
2023



Xiomara Maduro
MINISTER



UN GRAN BALUARTE DI ARUBA

**SR. HARRY
CROES**

A BAY LAGA NOS



***15-10-1948 - +10-10-2023**

Continuacion UN GRAN BALUARTE DI ARUBA SR HARRY CROES....

E siman aki comunidad a wordo conmovi cu e noticia cu Sr. Harry Croes a bay laga nos. Esaki tabata un noticia tristo pa Aruba henter, pa famia, amistadnan, muy en particular e mundo cultural di nos pais. Aruba a perde un gran Baluarte, un gran Arubiano, un persona grandi cu a stima, proteha, defende y promove nos Pais Aruba, su lucha, su deporte y su cultura grandemente.

HARRY CROES

Harry a nace dia 15 oktober 1948 y tabata biba na Kas Ariba 3 na Santa Cruz. Harry Croes ta yiu di Johan Croes y Ervilia Croes-Croes ambos den felis memoria.

Harry ta e di 9 yiu di un famia di 13 mas 4 yiu di ruman crianza cu ta bira total 17. Harry ta casa cu Sra. Ligia Mercedes Croes-Solognier y nan yiunan ta Jessica, Jairo y Mirla, Jean Carlo. Harry tin un total di 8 nieto(a). Un famia grandi y hopi amistad.

DEPORTE

Harry desde mucha tabata hopi activo. Durante su hubentud Harry a practica baseball, futbol y softball den bario di Macuarima y na St. Jozef School cerca frerenan.

Durante 1964 pa 1973 Harry a hunga pa U.S. Keds y Wrigley's P.K. y a coach e team di Frisian Flag hunto cu frere Gerardo. Harry a hunga pa SV Trappers, Arikok, Union y Sportboys. Despues Harry a bira refree di Aruba Voetbal Bond y a fluit weganan di Junioren, A-klas y Hoofdklas. E tabata hues di linea pa wega di Aruba contra Hulanda den Wilhelmina Stadion. Harry a sigui curso pa refree di FIFA cu exito y mester a ricibi su FIFA-badge, pero pa un motibonan desconoci, AVB te cu awe no a entrega esaki na Harry. El a para refree pa weganan na Aruba y Corsow. Di 1970 pa 1974 Harry a hunga pa Firestone y Mosaicos St. Helena durante weganan di Aruba Softbal Bond y a hunga pa St. Jozef School den campeonato escolar organisa pa YMCA.

Desde 1964 pa 1997 e pasion di Harry tabata boxeo. Apenas el a cumpli 16 aña Harry a bringa su prome pelea amateur contra Hector Cristina y a sali ganando. Na 1967 el a bringa "El Negrito del Batey Jr.". Un pelea dificil pero el a sali ganando. Harry a bringa 22 pelea amateur, gana 11, perde 10 y tabla 1. El a bringa 7 profesional di cual el gana 5 y a perde 2. Desde 1987 pa 1997 Harry a forma parti di World Boxing Council (W.B.C). Cu ayudo di Sr. Roy van Putten den felis memoria, Harry a keda reconoci como hues y refree pa boxeo internacional. Dia 14 di maart 1987, Harry a keda nombra hues y refree pa W.B.C, despues di a pasa e curso y a ricibi su "badge" internacional.

E tabata Hues pa pelea di titulo Mosca entre Richard Clark di Jamaica y Jimmy Fernandez di Mexico durante Campeonato Continental de las America teni na Mexico City. Tambe e tabata refree durante wega Centro Americano y del Caribe na Maracaibo, Venezuela. Harry a para refree y hues na e siguiente pais nan: Argentina, Las Vegas, Aruba, Belfast, Colombia, Curaçao, Guyana, Guadalupe, Haïti, Japon, Jamaica, Martinique, Merca, Mexico, Tailandia, Trinidad, Panama, California y Venezuela. Un total di 17 pais cu ta algo

historico. Na 1996 Harry tabata Hues di pelea mundial teni na Osaka, Japon. El a participa na alrededor di 100 pelea sea como boxdo, hues of refree.

Pa su 30 aña den mundo di boxeo dia 14 di maart di 1987 durante un ceremonia pa nan dedicacion den mundo di boxeo, Harry a reconoce varios ex boxdonan di Aruba e.o. Sugar Boy Nando, Kid Fenton, Batton Sikki y Efe Croes. Pa ocasion aki Roy van Putten dfm cu tabata vice-president W.B.C a haci entrega di plakaat na Prome Minister Sr. Nelson Oduber y na su turno a entrega na Sr. Harry Croes. Den Gobierno Insular di Aruba tambe Harry a yega di ricibi un plakaat di reconocimiento for di Diputado di Deporte Watty Vos. Na 2009 Harry a bira miembro di Salon di Fama na Aruba.

PRENSA

Harry Croes tabata tin un pasion pa noticia, suceso y acontecimiento. Pa hopi aña Harry a labora den prensa, como fotografo, redactor, hefe di redaccion, comentarista, presentador di noticia y varios programa na radio y television. Harry a traha na e.o. Corant Prome, BUVO, Matutino Diario, Top FM y hopi mas. Harry tabata conoci pa cubri sucesonan y tambe su forma unico di presenta su noticia, hopi biaha fuerte y critico, pero tambe cu su humor.

CONSEHERO

Harry Croes tabata tambe un consehero di Betico Croes y un persona di accion y semper cla pa defende su lider Betico Croes. Harry a participa y tabata cerca di acontecimentonan historico di nos pais den e lucha pa Status Aparte, manera e fundacion di partido MEP, lucha pa Status Aparte, introduccion di nos simbolonan nacional, Referendum, Betico ta wordo herida na Winston Veld, Augustus Scur, cantidad di campananan electoral, ademas e tabata yuda su lidernan Betico, Nel y Evelyn pa recluta candidatonan pa subi riba lista politico. Un persona di pueblo cu tabatin tin contacto semper cu pueblo y tabata transmiti e mensahe na su lider. Harry tabata e persona cu a introduci tambe Minister Xiomara Maduro na inicio di su carera politico na 2009.



Continuacion UN GRAN BALUARTE DI ARUBA SR HARRY CROES....

CULTURA

Den e lucha pa Status Aparte Betico a forma varios comision di trabao y aki Harry tambe a forma parti sea directamente of indirectamente, dunando su contribucion valioso na esakinan. Betico a pone central e nacionalismo nobo, e identidad tradicional y folklore di Aruba. Por ehempel ora cu Harry a sinti cu e Dande tabata bayendo perdi, Harry a acerca Betico y Betico a dune tur sosten pa haci tur lo posibel pa rebiba Dande den pueblo y esaki ela haci y a logra tambe. Awe tur fin di aña nos tin e Festival di Dande cu participacion di masha hopi grupo mes.

Harry tambe tabata un persona cu a conoce Betico hopi di cerca y a keda semper fiel na Betico. Harry a organisa e prome festival di Dande na 1971 den Conny Francis Club. E anochi aki tabata hopi exitoso ya cu no tabatin luga pa pone mas hende y pafo tabatin mas hende cu paden.

Cu e Festival di Dande, Harry a reconoce masha hopi cantante, compositor y musiconan. Tambe hopi hende cu a aporta na nos cultura di Dande y Harry a corona 39 ganadonan di Dande despues cu e corona a wordo introduci. Tambe Harry a introduci e propio composicion cual cancionnan a bira grandi y ta zona na radionan.

Na 1996 Harry a bini cu e idea pa organisa un festival cu ta dedica na Aruba su Himno y Bandera. E festival aki a bira

hopi grandi. Varios persona, cu a destaca pa añanan pa nan obra cultural, social y deportivo a haya reconocimiento di Harry. Tambe musiconan cu hopi aña a dedica cancionnan na pais Aruba. Harry a organisa un total di 50 Festival di Dande y Propio Composicion y un total di 26 Festival Un Canto pa Aruba su Himno y Bandera.

Danki na e festivalnan aki cu tabata un total di entre 40 pa 80 participante den cada edicion, a duna oportunidad na compositor- y areglistanan trece nan creatividad y talento dilanti y esaki Aruba a enrikece cu mas di 1000 composicion na Papiamento of miho bisa mucho mas, dedica na nos pais cualnan a hopi a bira clasico den nos historia musical y cu ta wordo scucha cu frecuencia na nos radio emisoranan.

E cancionnan aki despues tabata wordo presenta riba Dianan Nacional manera Dia di Betico, Dia di Himno y Bandera, durante Manifestacion Cultural y Acto Protocolar, como tambe den celebracionnan den bario y otro actividad y eventonan riba nos Pais.

Ademas mester menciona cu Harry su amor patrio tabata hopi grandi y tambe ela bini cu e iniciativa na fin di añanan 90 pa e ceremonia pa hisa e bandera di mas grandi di Aruba na Cede Libertador G.F. Betico Croes. E ceremonia aki tabata pa 12 or di anochi ora cu habri e dia di Himno y Bandera, nos bandera di Aruba ta wordo hisa.





RECONOCIMIENTO

Pa su trayectoria y dedicacion riba varios tereno Harry a haya reconocimiento. Pa menciona algun na 1999 Harry a wordo condecora como Ridder in de Orde van Oranje Nassau, pa su logronan di Deporte y Cultura.

Na 2017 y 2020 Harry a haya reconocimiento di parti Gobierno

di Aruba pa medio di Minister di Cultura Xiomara Maduro pa decananan dedica na organisa Festival di Dande y asina mantene nos folklore y nos tradicion di fin di aña di Dande, bibe den mente y curason di tur cu ta stima y aprecia nos Pais Aruba. Harry a haya reconocimiento tambe pa su dedicacion den e.o. prensa, deporte, cultura y tereno social na nos Pais Aruba.



LUNA DI CONSCIENTISACION DI
CANCER NA PECHO

OCTOBER
2023

Geoffrey Wever
MINISTER



AGRI BUSINESS ACADEMY

TA IMPORTANTE PA STIMULA MAS NEGOSHI AGRICOLA

Cu dos programa exitoso di AGRI Business Academy tras di lomba, un sondeo a tuma lugar bao di e participanten pa haya mas informacion riba e programa y su impacto. Minister Geoffrey Wever y minister Ursell Arends hunto cu Qredits Aruba ta organisa e programa AGRI Business Academy como instrumento di maneho pa stimula pa mas negoshi habri of expande den e sector di agricultura y contribui na diversifica Aruba su economia.

AGRI Business Academy ta un programa pa (futuro) empresarionan cu kier cuminsa nan propio negoshi of cu tin nan negoshi caba den e sector di agricultura haya mas conocimiento y experiencia den e area di "Business Management".

Resultado di un sondeo ta indica cu algun participante a cuminsa cu nan mesun negoshi despues di a participa na e AGRI Business Academy. Tambe tin interes bao di e participantenan pa cuminsa cu nan propio negoshi Agricola den e siguiente 6 - 12 luna. Un mayoria (mas cu 50%) a indica cu tin necesidad di financiamiento pa cuminsa of expande nan negoshi Agricola. Pa loke ta trata tuma cursonan adicional den e area di negoshi Agricola, un mayoria a indica di tuma curso adicional y riba e area di "Business Management", "Water Management", "Hydroponics" y "Aquaculture and Aquaponics".

Informacion ricibi di participantenan ta indica cu como instrumento di maneho AGRI Business Academy ta stimula



participantenan habri nan mesun negoshi den e sector di agricultura, un meta importante di maneho economico di Gobierno di Aruba, segun minister Geoffrey Wever. Facilita un programa manera e AGRI Business Academy ta necesario segun e sondeo, mirando e interes cu ta existi pa cursonan adicional. Minister Geoffrey Wever ta contento cu e exito di e programa AGRI Business Academy y lo sigui traha hunto cu minister Ursell Arends y Qredits Aruba pa sigui facilita banda di cursonan adicional tambe traha maneho pa mas acceso

na financiamiento, cu lo contribui mas ainda na mas negoshi agricola.

Minister Geoffrey Wever y minister Ursell Arends ta gradici tur participante di e AGRI Business Academy cu a haci esaki un exito. Un palabra di danki tambe na Qredits Aruba pa un bon cooperacion pa hunto ofrece AGRI Business Academy na tur ciudadano, un programa cu lo sigui contribui pa stimula e pontencial economico di sector di agricultura.

**Positivismo ta uni un pais,
y ta transforma desafionan den oportunidadnan
y ta laga e pais mira diferencianan como e forza
cu ta traspasa bareranan pa pusha e pais
pa un futuro cu posibilidadnan sin fin.**

LUNA DI CONSCIENTISACION DI
CANCER NA PECHO

OCTOBER
2023



Rocco Tjon
MINISTER



BAN PLANTA PA SALUD MENTAL

Recientemente, Minister di Husticia y Asuntonan Social sr. Rocco Tjon, tawata presente na e evento di “Let’s plant for mental health”, pues ban planta pa salud mental, un iniciativa sumamente bunita for di e cadena social den conexion cu dia mundial di salud mental. Ta asina cu nos profesionalnan den e cadena social cu ta atende cu e tematica di salud mental, a uni hunto cu e organisacion “Trees for Aruba” pa asina hunto planta mata como simbolo di conscientisacion pa cu salud mental.

E tematica di Salud Mental ta toca nos tur, y e no ta discrimina, tampoco e ta haci distincion, pa cual motibo tambe e ta hala atencion di tur hende den nos comunidad. Manera ta conoci, siman pasa nos tawata presente como Aruba na e di cinco “Global Mental Health Summit” na Argentina, y mes ora nos por a ripara cu e retonan pa loke ta trata salud mental ta igual na tur parti di mundo.



Continuacion BAN PLANTA PA SALUD MENTAL....

Locual ta resalta mas entre varios pais, ta e scarcedad di personal, e necesidad pa kibra e stigma, e importancia pa programanan social pa brinda sosten y tambe e enfoke multi-sectoral cu ta hopi necesario. Esaki ta e motibo pakico na Aruba nos a introduci e stuurgroep GGZ, pa di e forma ey hunto cu tur profesional nos por percura pa un miho coordinacion y duna contenido real na e enfoke multi-sectoral.

Algo hopi importante pa salud mental por keda riba agenda ta, pa nos tur keda papia di e topico, pa di e forma ey nos

logra kibra e stigma. Eventonan manera “Let’s plant for mental health” ta percura pa nos logra esaki.

Por ultimo, e mandatario a manda palabranan di pabien y gradicimento na henter e personal cu ta labora den e area aki. E trabou aki ta uno dificil, hopi biaha un trabou cu no ta wordo balora door di comunidad.

Y como Gobierno di Aruba, nos ta balora y aprecia e trabou aki inmensamente, semper laborando na e bienestar di nos comunidad. ■■■



LUNA DI CONSCIENTISACION DI
CANCER NA PECHOOCTOBER
2023Endy Croes
MINISTER

MINISTER ENDY CROES A REALISA UN RECORIDO RIBA E EDUCACION PROFESIONAL INTERMEDIO (EPI)

Diabierna mainta, Minister Endy Croes a haci un bishita oficial na Colegio EPI. Colegio EPI ta prepara nos hobennan pa drenta mercado laboral. Actualmente, EPI ta conta cu 1644 estudiante.

Na yegada directora Sra. Ankie Danker y staf di Colegio EPI a duna mandatario di Enseñansa y Deporte un caluroso bonbini na e scol. Minister Endy Croes a ricibi un presentacion amplio di unda EPI ta na e momento aki y unda nan kier bay cu e scol. Directora Sra. Ankie Danker a presenta e vision y dialoga riba algun inkietud, entre otro, cierto mantencion y cu a tuma contacto cu DOW.

Minister Endy Croes a comparti un momento ameno cu e “unit managers” di Colegio EPI y cera conoci cu e staf y docentenan di e scol. Despues, Minister Endy Croes a haya un recorrido di e scol unda a bishita e sector di Ciencia y Tecnologia, Economia, Salubridad y Servicio y Hospitalidad y Turismo. E mandatario a presencia con e alumnonan ta ricibi les y practica.

Minister Endy Croes a enfatisa cu ta di vital importancia pa estrecha e comunicacion entre Ministerio di Enseñansa, staf, “unit manager” y docentenan di EPI.

Hunto nos tin cu traha pa logra e bienestar di e alumno. Tambe, nos tin cu analisa e necesidad di e mercado laboral, pa asina ahusta e estudionan. Na e momento aki EPI ta ofrece diescinco (15) estudio na e necesidad di e mercado laboral.

Pa conclui, Minister Endy Croes a indica cu EPI ta riba un bon caminda. Minister Endy Croes ta gradici e directora, staf, docente- y alumnonan pa e caluroso recepcion. Alabes ta desea e docente- y alumnonan un exitoso aña escolar 2023 – 2024.

Conta cu sosten di Gabinete Wever – Croes II pa hunto nos saca e scol aki padilanti.

Potretnan MINISTER ENDY CROES A REALISA RECORDIDO....





Minister Endy Croes a bishita e **ATLETANAN DI GIHAE GYMNASTICS** pa felicitanan cu nan extraordinario presentacion na Copa Iga Internacional 2023 cu a tuma luga na Panama

A konkista 80 medaya: oro, plata y brons.

Diaranson atardi, Minister Endy Croes a bishita e atletanan di Gihae Gymnastics na nan acomodacion na Santa Cruz. E atletanan a mostra e mandatario di Deporte e premio- y medayanan cu nan a konkista den e COPA IGA internacional cu a tuma luga na Panama.

Un total di 800 gimnasta di 13 pais a participa. Pa Aruba un grupo di 19 gimnasta a competi y a logra konkista 80 medaya: oro, silver y brons. Durante conferencia di prensa special aki, Sra. Melissa Noguera lider di Gihae Gymnastics a hiba palabra y a splica un poco mas di e competencia y e medayanan cu nan a konkista den diferente categoria.

Minister Endy Croes tabata presente pa felicita e atleta-, coach-, y mayornan cu a traha duro pa logra e excelente resultado aki pa Pais Aruba. Minister Endy Croes a sorprende e gimnastanan cu un treat chikito pa celebra e resultado extraordinario aki.

Pa conclui, Minister Endy Croes ta felicita e atletanan pa nan excelente presentacion y logro. Tambe, mandatario di Deporte ta felicita Sra. Melissa Noguera y e mayornan cu ta aporta na e deporte di nan yiu. Alabes ta gradici e coachnan cu ta percura pa nos hobennan por desaroya nan talento pa por competi e plataforma internacional.

Minister Endy Croes a enfatisa cu el lo keda monitor nan y e ta sigur cu di e club aki lo sali hopi streaman cu lo pone e bandera di Aruba sigui briya riba plataforma internacional. Pabien y hopi exito! Cu deseo, disciplina, dedicacion y determinacion ta logra.





Pueblo di Aruba a baha masalmente pa apoya nos seleccion masculino cu ta gana US Virgin Islands 3-1 riba e
VELD DI FUTBOL NOBO

Aruba tin un hoy a di stadion na Dakota cu ta cumpli cu tur standard internacional di FIFA

ORANJESTAD: Diasabra atardi, tabata prome biaha despues di shete (7) aña cu seleccion di Aruba a hunga un wega oficial na cas. Pueblo di Aruba a baha masalmente pa presencia e wega clasificatorio di CONCACAF Nations League unda cu nos Seleccion Masculino a enfrenta US Virgin Islands.

Manera ta conoci, Compleho Deportivo Guillermo Prospero Trinidad ta den pleno renobacion y no ta cla ainda, pero FIFA a aproba e yerbe artificial y a haci algun excepcion pa e weganen clasificatorio di CONCACAF Nations League por a tuma luga na stadion Dakota.

Minister Endy Croes a indica cu na luna di mei a haci e palabracion cu si cumpli y logra renoba e turf y si e turf ta aproba pa FIFA, FIFA lo duna un excepcion pa hunga e wega cas. Tur stakeholder a traha duro pa cumpli cu e lista di excepcion y pa tin tur cos na ordo pa asina nos seleccion por a hunga na cas. Desde diaranson, tin un representante di CONCACAF na Aruba cu a controla e trabou.

Minister Endy Croes a enfatisa cu hunto den ekipo a logra pa Aruba hunga na cas. Sigur un bunita wega unda cu nos Seleccion Masculino a gana US Virgin Islands cu e score di 3-1, golnan anota pa Rovien Ostiana, Diederick Luydens y Mishawn Molina. Quin Farrel a anota e unico gol pa US Virgin Islands. Pa conclui, Minister Endy Croes ta gradici Gabinete Wever – Croes II y Lotto pa Deporte pa pone e fondonan disponibel pa renobacion di e stadion. Tambe, mandatario di Deporte a subraya cu e ta contento di e colaboracion cu CONCACAF, FIFA, AVB y alabes minister Endy Croes ta felicita Seleccion di Aruba cu e gran victoria aki.

Palabranan di pabien na entrenado Sr. Marvic Bermudez y su staf y ta gradici Pueblo di Aruba cu a sa di sostene nos Seleccion Masculino.

Pabien Aruba! Cu disciplina, deseo, dedicacion y determinacion a logra.





NOS MISION PA CONSCIENTISA

Luna di October pa hopi, ta un luna cu por sinti diferente. Den e luna aki, algun hende muhe ta bisti roos pa festeha nan triunfo, algun ta celebra e luna discretamente den nan proceso, algun ta biba e perdida di un ser stima, y otro ta sinti nan mes so y tristo.

Den e luna aki, Luna di Conscientisacion di Cancer na Pecho, como ciudadanonan concerni, ban uni pa normalisa e sentimentonan aki. October Roos, bisti algo roos pa muestra sosten na esnan cu a cura, famianan cu a perde nan ser stima, na esnan cu tin cancer na pecho y esnan cu a keda sinti nan mes nan so y tristo despues cu nan a haya sanacion.